

1 点绛唇·感兴

作者:王禹

雨恨云愁,江南依旧称佳丽。
水村渔市,一缕孤烟细。
天际征鸿,遥认行如缀。
平生事,此时凝睇,谁会凭阑意。

2 酒泉子

作者:潘阆

长忆西湖,尽日凭阑楼上望,
三三两两钓鱼舟,岛屿正清秋。
笛声依约芦花里,白鸟成行忽惊起。
别来闲整钓鱼竿,思入水云寒。

3 酒泉子

作者:潘阆

长忆观潮,满郭人争江上望。
来疑沧海尽成空,万面鼓声中。
弄涛儿向涛头立,手把红旗旗不湿。
别来几向梦中看,梦觉尚心寒。

4 相思令

作者:林逋

吴山青,越山青,
两岸青山相对迎,
争忍有离情,
君泪盈,妾泪盈,
罗带同心结未成,
江边潮已平。

5 少年游

作者:柳永

参差烟树灞陵桥,
风物尽前朝。
衰杨古柳,几经攀折,
憔悴楚宫腰。
夕阳闲淡秋光老,离思满蘅皋。
一曲《阳关》,
断肠声尽,
独自凭兰桡。

6 醉垂鞭

作者:张先

双蝶绣罗裙,
东池宴,初相见。
朱粉不深匀,闲花淡淡春。
细看诸处好,
人人道,柳腰身。
昨日乱山昏,来时衣上云。

7 菩萨蛮

作者:张先

忆郎还上层楼曲,楼前芳草年年绿。
绿似去时袍,回头风袖飘。
郎袍应已旧,颜色非长久。
惜恐镜中春,不如花草新。

8 诉衷情

作者:张先

花前月下暂相逢,苦恨阻从容。
何况酒醒梦断,花谢月朦胧。
花不尽,月无穷,两心同。
此时愿作,杨柳千丝,绊惹春风。

9 菩萨蛮

作者:张先

玉人又是匆匆去,马蹄何处垂杨路?
残日倚楼时,断魂郎未知。
阑干移倚遍,薄倖教人怨。
明月却多情,随人处处行。

10 木兰花·和孙公素别安陆

作者:张先

相离徒有相逢梦,门外马蹄尘已动。
怨歌留待醉时听,远目不堪空际送。
今宵风月知谁共,声咽琵琶槽上凤。
人生无物比多情,江水不深山不重。

11 木兰花·乙卯吴兴寒食

作者:张先

龙头舴艋吴儿竞,笋柱秋千游女并。
芳洲拾翠暮忘归,秀野踏青来不定。
行云去后遥山暝,已放笙歌池院静。
中庭月色正清明,无数杨花过无影。

12 浣溪沙

作者:张先

楼倚春江百尺高,烟中还未见归桡,
几时期信似江潮?
花片片飞风弄蝶,柳阴阴下水平桥,
日长才过又今宵。

13 青门引·春思

作者:张先

乍暖还轻冷,风雨晚来方定。
庭轩寂寞近清明,
残花中酒,又是去年病。
楼头画角风吹醒,入夜重门静。
那堪更被明月,隔墙送过秋千影。

14 浣溪沙

作者：晏殊

一曲新词酒一杯，去年天气旧亭台，
夕阳西下几时回。

无可奈何花落去，似曾相识燕归来，
小园香径独徘徊。

15 浣溪沙

作者：晏殊

小阁重帘有燕过，晚花红片落庭莎，
曲阑干影入凉波。一霎好风生翠幕，
几回疏雨滴圆荷，酒醒人散得愁多。

16 浣溪沙

作者：晏殊

一向年光有限身，等闲离别易销魂，
酒筵歌席莫辞频。

满目山河空念远，落花风雨更伤春，
不如怜取眼前人。

17 清平乐

作者：晏殊

红笺小字，说尽平生意。

鸿雁在云鱼在水，惆怅此情难寄。

斜阳独倚西楼，遥山恰对帘钩。

人面不知何处，绿波依旧东流。

18 玉楼春·春恨

作者：晏殊

绿杨芳草长亭路，年少抛人容易去。
楼头残梦五更钟，花底离情三月雨。
无情不似多情苦，一寸还成千万缕。
天涯海角有穷时，只有相思无尽处。

19 踏莎行

作者：晏殊

祖席离歌，长亭别宴。

香尘已隔犹回面。

居人匹马映林嘶，行人去棹依波转。

阁魂消，高楼目断，

斜阳只送平波远。

无穷无尽是离愁，天涯地角寻思遍。

20 踏莎行

作者：晏殊

小径红稀，芳郊绿遍，

高台树色阴阴见。

春风不解禁杨花，濛濛乱扑行人面。

翠叶藏莺，珠帘隔燕，

炉香静逐游丝转。

一场愁梦酒醒时，斜阳却照深深院。

21 采桑子

作者：欧阳修

轻舟短棹西湖好，

绿水逶迤，芳草长堤，

隐隐笙歌处处随。

无风水面琉璃滑，

不觉船移，微动涟漪，

惊起沙禽掠岸飞。

22 采桑子

作者：欧阳修

画船载酒西湖好，

急管繁弦，玉盏催传，

稳泛平波任醉眠。

行云却在行舟下，

空水澄鲜。俯仰留连，

疑是湖中别有天。

23 采桑子

作者：欧阳修

群芳过后西湖好，

狼籍残红，飞絮濛濛，

垂柳阑干尽日风。

笙歌散尽游人去，始觉春空。

垂下帘栊，双燕归来细雨中。

24 长相思

作者：欧阳修

蘋满溪，柳绕堤，

相送行人溪水西，

回时陇月低。

烟霏霏，风凄凄，

重倚朱门听马嘶，

寒鸥相对风。

25 踏莎行

作者：欧阳修

候馆梅残，溪桥柳细，

草薰风暖摇征辔。

离愁渐远渐无穷，迢迢不断如春水。

寸寸柔肠，盈盈粉泪，

楼高莫近危阑倚。

平芜尽处是春山，行人更在春山外。

26 生查子·元夕

作者：欧阳修

去年元夜时，花市灯如昼。
月到柳梢头，人约黄昏后。
今年元夜时，月与灯依旧。
不见去年人，泪满春衫袖。

27 玉楼春

作者：欧阳修

别后不知君远近，触目凄凉多少闷。
渐行渐远渐无书，水阔鱼沉何处问。
夜深风竹敲秋韵，万叶千声皆是恨。
故敲单枕梦中寻，梦又不成灯又烬。

28 浪淘沙

作者：欧阳修

把酒祝东风，且共从容。
垂杨紫陌洛城东，
总是当时携手处，游遍芳丛。
聚散苦匆匆，此恨无穷。
今年花胜去年红。
可惜明年花更好，知与谁同？

29 望江南

作者：欧阳修

江南柳，花柳两相柔。
花片落时黏酒盏，柳条低处拂人头，
各自是风流。
江南月，如镜复如钩。
似镜不侵红粉面，似钩不挂画帘头，
长是照离愁。

30 菩萨蛮·集句

作者：王安石

海棠乱发皆临水，君知此处花何似？
凉月白纷纷，香风隔岸闻。
啜枝黄鸟近，隔岸声相应。
随意坐莓苔，飘零酒一杯。

31 浣溪沙

作者：王安石

百亩中庭半是苔，门前白道水萦回。
爱闲能有几人来。
小院回廊春寂寂，山桃溪杏两三栽。
为谁零落为谁开？

32 南乡子

作者：王安石

自古帝王州，郁郁葱葱佳气浮。
四百年来成一梦，
堪愁，晋代衣冠成古丘。
绕水恣行游。
上尽层城更上楼。
往事悠悠君莫问，回头。
槛外长江空自流。

33 鹧鸪天

作者：晏几道

彩袖殷勤捧玉钟，当年拚却醉颜红。
舞低杨柳楼心月，歌尽桃花扇底风。
从别后，忆相逢，几回魂梦与君同。
今宵剩把银缸照，犹恐相逢是梦中。

34 点绛唇

作者：晏几道

扛花信来时，恨无人似花依旧，
又成春瘦，折断门前柳。
天与多情，不与长相守。
分飞后，泪痕和酒，占了双罗袖。

35 鹧鸪天

作者：晏几道

醉拍春衫惜旧香，天将离恨恼疏狂。
年年陌上生秋草，日日楼中到夕阳。
云渺渺，水茫茫，征人归路许多长。
相思本是无凭语，莫向花笺费泪行。

36 生查子

作者：晏几道

坠雨已辞云，流水难归浦。
遗恨几时休，心抵秋莲苦。
忍泪不能歌，试托哀弦语。
弦语愿相逢，知有相逢否？

37 浣溪沙

作者：晏几道

日日双眉斗画长，行云飞絮共轻狂。
不将心嫁冶游郎。
溅酒滴残歌扇字，弄花熏得舞衣香。
一春弹泪说凄凉。

38 诉衷情

作者：晏几道

长因惠草记罗裙，绿腰沉水熏。
阑干曲处人静，曾共倚黄昏。
风有韵，月无痕，暗消魂。
拟将幽恨，试写残花，寄与朝云。

39 鹧鸪天

作者：晏几道

小令尊前见玉箫，银灯一曲太妖娆。
歌中醉倒谁能恨？唱罢归来酒未消。
春悄悄，夜迢迢，碧云天共楚宫遥。
梦魂惯得无拘检，又踏杨花过谢桥。

40 卜算子·送鲍浩然之浙东

作者：王观

水是眼波横，山是眉峰聚。
欲问行人去哪边？眉眼盈盈处。
才始送春归，又送君归去。
若到江东赶上春，千万和春住。

41 西江月

作者：苏轼

世事一场大梦，人生几度秋凉。
夜来风叶已鸣廊，看取眉头鬓上。
酒贱常愁客少，月明多被云妨。
中秋谁与共孤光，把酒凄然北望。

42 西江月

作者：苏轼

照野弥弥浅浪，横空隐隐层霄。
障泥未解玉骢骄，我欲醉眠芳草。
可惜一溪明月，莫教踏破琼瑶。
解鞍敲枕绿杨桥，杜宇一声春晓。

43 鹧鸪天

作者：苏轼

林断山明竹隐墙，乱蝉衰草小池塘。
翻空白鸟时时见，照水红蕖细细香。
村舍外，古城旁，
杖藜徐步转斜阳。
殷勤昨夜三更雨，又得浮生一日凉。

44 卜算子·感旧

作者：苏轼

蜀客到江南，长忆吴山好。
吴蜀风流自古同，归去应须早。
还与去年人，共藉西湖草。
莫惜尊前仔细看，应是容颜老。

45 卜算子·黄州定惠院寓居作

作者：苏轼

缺月挂疏桐，漏断人初静。
时见幽人独往来，缥缈孤鸿影。
惊起却回头，有恨无人省。
拣尽寒枝不肯栖，枫落吴江冷。

46 生查子·诉别

作者：苏轼

三度别君来，此别真迟暮。
白尽老髭须，明白淮南去。
酒罢月随人，泪湿花如雾。
后月逐君还，梦绕湖边路。

47 点绛唇

作者：苏轼

醉漾轻舟，信流引到花深处。
尘缘相误，无计花间住。
烟水茫茫，千里斜阳暮。
山无数，乱红如雨，
不记来时路。

48 阳关曲·中秋作

作者：苏轼

暮云收尽溢清寒，
银汉无声转玉盘。
此生此夜不长好，
明月明年何处看？

49 浣溪沙·游蕲水清泉寺，寺临兰溪，溪水西流

作者：苏轼

山下兰芽短浸溪，松间沙路净无泥，
萧萧暮雨子规啼。
谁道人生无再少，门前流水尚能西，
休将白发唱黄鸡。

50 浣溪沙

作者：苏轼

旋抹红妆看使君，三三五五棘篱门，
相挨踏破茜罗裙。
老幼扶携收麦社，乌鸢翔舞赛神村，
道逢醉叟卧黄昏。

51 浣溪沙

作者：苏轼

簌簌衣巾落枣花，村南村北响缫车，
牛衣古柳卖黄瓜。
酒困路长惟欲睡，日高人渴漫思茶，
敲门试问野人家。

52 浣溪沙

作者：苏轼

软草平莎过雨新，轻沙走马路无尘，
何时收拾耦耕身。
日暖桑麻光似泼，风来蒿艾气如薰，
使君元是此中人。

53 调笑令

作者：苏轼

渔父，渔父，
江上微风细雨，
青蓑黄箬裳衣。
红酒白鱼暮归。
归暮，归暮，
长笛一声何处。

54 南歌子·湖州作

作者：苏轼

山雨潇潇过，溪桥浏浏清。
小园幽榭枕蘋汀。
门外月华如水、彩舟横。
茗岸霜花尽，江湖雪阵平。
两山遥指海门青，
回首水云何处、觅孤城。

55 浣溪沙

作者：苏轼

山色横侵蘸晕霞，湘川风静吐寒花。
远林屋散尚啼鸦。
梦到故园多少路，酒醒南望隔天涯。
月明千里照平沙。

56 减字木兰花·琴

作者：苏轼

神闲意定，万籁收声天地静。
玉指冰弦，未动宫商意已传。
悲风流水，写出寥寥千古意。
归去无眠，一夜馀音在耳边。

57 如梦令·题淮山楼

作者：苏轼

城上层楼叠巘，城下清淮古汴。
举手揖吴云，人与暮天俱远。

魂断，魂断，
后夜松江月满。

58 卜算子

作者：李之仪

我住长江头，君住长江尾。
日日思君不见君，共饮长江水。
此水几时休？此恨何时已？
只愿君心似我心，定不负相思意。

59 忆秦娥·用太白韵

作者：李之仪

清溪咽，霜风洗出山头月。
山头月，迎得云归，还送云别。
不知今是何时节？凌歊望断音尘绝。
音尘绝，帆来帆去，天际双阙。

60 菩萨蛮

作者：舒亶

画船捶鼓催君去，高楼把酒留君住。
去住若为情？西江潮欲平。
江潮容易得，只是人南北。
今日此尊空，知君何日同。

61 卜算子·分题得苔

作者：舒亶

池台小雨干，门巷香轮少。
谁把青钱衬落红，满地无人扫。
何时斗草归，几度寻花了。
留得佳人莲步痕，宫样鞋儿小。

62 清平乐

作者：黄庭坚

春归何处？寂寞无行路。
若有人知春去处，唤取归来同住。
春无踪迹谁知，除非问取黄鹂。
百啭无人能解，因风飞过蔷薇。

63 诉衷情

作者：黄庭坚

一波才动万波随，蓑笠一钩丝。
锦鳞正在深处，千尺也须垂。
吞又吐，信还疑，
上钩迟。水寒江静，
满目青山，载月明归。

64 醉落魄

作者：黄庭坚

苍颜华发，故山归计无因得。
旧交新贵音书绝。
惟有家人，犹作殷勤别。
离亭欲去歌声咽，潇潇细雨凉生颊。
泪珠不用罗巾裹，弹在罗衫，
图得见时说。

65 采桑子

作者：黄庭坚

投荒万里无归路，雪点鬓繁。
度鬼门关，已拚儿童作楚蛮。
黄云苦竹啼归去，绕荔枝山。
蓬户身闲，歌板谁家教小鬟。

66 菩萨蛮

作者：李元膺

彩旗画柱清明后，花前姊妹争携手。
先紧绣罗裙，轻衫束领巾。
琐绳金钏响，渐出花梢上。
笑里问高低，盘云鞞玉螭。

67 鹊桥仙

作者：秦观

纤云弄巧，飞星传恨，
银汉迢迢暗度。
金风玉露一相逢，
便胜却、人间无数。
柔情似水，佳期如梦，
忍顾鹊桥归路。
两情若是久长时，
又岂在、朝朝暮暮。

68 减字木兰花

作者：秦观

天涯旧恨，独自凄凉人不问。
欲见回肠，断尽金炉小篆香。
黛蛾长敛，任是春风吹不展。
困倚危楼，过尽飞鸿字字愁。

69 浣溪沙

作者：秦观

漠漠轻寒上小楼，晓阴无赖似穷秋。
淡烟流水画屏幽。
自在飞花轻似梦，无边丝雨细如愁。
宝帘闲挂小银钩。

70 如梦令

作者：秦观

遥夜沉沉如水，风紧驿亭深闭。
梦破鼠窥灯，霜送晓寒侵被。
无寐，无寐，门外马嘶人起。

71 调笑令

作者：秦观

柳岸，水清浅。
笑折荷花呼女伴，
盈盈日照新妆面。
水调空传幽怨，
扁舟日暮笑声远，
对此令人肠断。

72 如梦令

作者：秦观

池上春归何处？
满目落花飞絮。
孤馆悄无人，梦断月堤归路。
无绪，无绪，
帘外五更风雨。

73 阮郎归

作者：秦观

湘天风雨破寒初，深沉庭院虚。
丽谯吹罢《小单于》，迢迢清夜租。
乡梦断，旅魂孤，
峥嵘岁又除。
衡阳犹有雁传书，郴阳和雁无。

74 好事近·梦中作

作者：秦观

春路雨添花，花动一山春色。
行到小溪深处，有黄鹂千百。
飞云当面化龙蛇，夭矫转空碧。
醉卧古藤阴下，了不知南北。

75 踏莎行

作者：秦观

雾失楼台，月迷津渡，
桃源望断无寻处。
可堪孤馆闭春寒，杜鹃声里斜阳暮。
驿寄梅花，鱼传尺素，
砌成此恨无重数。
郴江幸自绕郴山，为谁流下潇湘去。

76 画堂春

作者：秦观

落红铺径水平池，弄晴小雨霏霏，
杏园憔悴杜鹃啼，无奈春归。
柳外画楼独上，凭阑手捻花枝。
放花无语对斜晖，此恨谁知？

77 西江月·秋兴

作者：米芾

溪面荷香粲粲，林端远岫青青。
楚天秋色太多情，云卷烟收风定。
夜静冰娥欲上，梦回醉眼初醒。
玉瓶未耻有新声，一曲请君来听。

78 浣溪沙·野眺

作者：米芾

日射平溪玉宇中，云横远渚岫重重，
野花犹向涧边红。
静看沙头鱼入网，闲支藜杖醉吟风，
小春天气恼人浓。

79 鹧鸪天·半死桐

作者：贺铸

重过阊门万事非，同来何事不同归？
梧桐半死清霜后，头白鸳鸯失伴飞。
原上草，露初晞，
旧栖新垅两依依。
空床卧听南窗雨，谁复挑灯夜补衣！

80 捣练子·夜捣衣

作者：贺铸

收锦字，下鸳机，
净拂床砧夜捣衣。

马上少年今健否？
过瓜时见雁南归。

81 捣练子·杵声齐

作者：贺铸

砧面莹，杵声齐，
捣就征衣泪墨题。
寄到玉关应万里，
戍人犹在玉关西。

82 捣练子·夜如年

作者：贺铸

斜月下，北风前，
万杵千砧捣欲穿。
不为捣衣勤不睡，
破除今夜夜如年。

83 捣练子·剪征袍

作者：贺铸

抛练杵，傍窗纱，
巧剪征袍斗出花。
想见陇头长戍客，
授衣时节也思家。

84 捣练子·望书归

作者：贺铸

边堠远，置邮稀，
附与征衣衬铁衣。
连夜不妨频梦见，
过年惟望得书归。

85 芳心苦

作者：贺铸

杨柳回塘，鸳鸯别浦，
绿萍涨断莲舟路。
断无蜂蝶慕幽香，
红衣脱尽芳心苦。
返照迎潮，行云带雨。
依依似与骚人语。
当年不肯嫁春风，
无端却被秋风误。

86 唤春愁

作者：贺铸

天与多情不自由，占风流。
云闲草远絮悠悠，唤春愁。
试作小妆窥晚镜，淡蛾羞。
夕阳独倚水边楼，认归舟。

87 掩萧斋

作者：贺铸

落日逢迎朱雀街，共乘青舫渡秦淮。笑
拈飞
絮冒金钗。洞户华灯归别馆
, 碧梧红药掩萧斋, 愿随明月入君怀。

88 锦缠头

作者：贺铸

旧说山阴禊事修，漫书茧纸叙清游。
吴门千载更风流。
绕郭烟花连茂苑，满船丝竹载《凉州》，
一标争胜锦缠头。

89 忆秦娥·子夜歌

作者:贺铸

三更月,中庭恰照梨花雪。
梨花雪,不胜凄断,
杜鹃啼血。
王孙何许音尘绝,
柔桑陌上吞声别。
吞声别,垄头流水,
替人呜咽。

90 采桑子

作者:贺铸

东亭南馆逢迎地,几醉红裙。
凄怨临分,四叠《阳关》忍泪闻。
谁怜今夜篷窗雨,何处渔村。
酒冷灯昏,不许愁人不断魂。

91 菩萨蛮

作者:贺铸

厌厌别酒商歌送,萧萧凉叶秋声动。
小泊画桥东,孤舟月满篷。
高城遮短梦,衾藉馀香拥。
多谢五更风,犹闻城里钟。

92 菩萨蛮

作者:贺铸

彩舟载得离愁动,
无端更借樵风送。
波渺夕阳迟,销魂不自持。
良宵谁与共?
赖有窗间梦。
可奈梦回时,一番新别离。

93 忆仙姿

作者:贺铸

日日春风楼上,不见石城双桨。
鸳枕梦回时,烛泪屏山相向。
流荡,流荡,
门外白蘋溪涨。

94 忆仙姿

作者:贺铸

江上潮回风细,红袖倚楼凝睇。
天际认归舟,但见平林如荠。
迢递,迢递,
人更远于天际。

95 忆仙姿

作者:贺铸

梦想山阴游冶,深径碧桃花谢。
曲水稳流觞,暖絮芳兰堪藉。
潇洒,潇洒,
月棹烟蓑东下。

96 忆仙姿

作者:贺铸

莲叶初生南浦,两岸绿杨飞絮。
向晚鲤鱼风,断送彩帆何处?
凝伫,凝伫,
楼外一江烟雨。

97 忆秦娥

作者:贺铸

晓朦胧，前溪百鸟啼匆匆。
啼匆匆，凌波人去，拜月楼空。
去年今日东门东，鲜妆辉映桃花红。
桃花红，吹开吹落，一任东风。

98 清平乐

作者：贺铸

厌厌别酒，更执纤纤手。
指似归期庭下柳，一叶西风前后。
无端不系孤舟，载将多少离愁。
又是十分明月，照人两处登楼。

99 清平乐

作者：贺铸

林皋叶脱，楼下清江阔。
船里琵琶金捍拨，弹断么弦再抹。
夜潮洲渚生寒，城头星斗阑干。
忍话旧游新梦，三千里外长安。

100 减字浣溪沙

作者：贺铸

秋水斜阳演漾金，远山隐隐隔平林，
几家村落几声砧。
记得西楼凝醉眼，昔年风物似如今，
只无人与共登临。

101 减字浣溪沙

作者：贺铸

青翰舟中裊袂筵，粉娥窥影两神仙。
酒阑飞去作非烟。
重访旧游人不見，雨荷风蓼夕阳天。

折花临水思茫然。

102 天门谣

作者：贺铸

牛渚天门险，
限南北，七雄豪占。
清雾敛，与闲人登览。
待月上潮平波滟滟，
塞管轻吹新《阿滥》。
风满槛，历历数、西州更点。

103 减字浣溪沙

作者：贺铸

闲把琵琶旧谱寻，四弦声怨却沉吟，
燕飞人静画堂深。
欹枕有时成雨梦，隔帘无处说春心，
一从灯夜到如今。

104 南歌子

作者：仲殊

十里青山远，潮平路带沙。
数声啼鸟怨年华。
又是凄凉时候、在天涯。
白露收残暑，清风衬晚霞。
绿杨堤畔闹荷花。
记得年时沽酒、那人家。

105 诉衷情·寒食

作者：仲殊

涌金门外小瀛洲，寒食更风流。
红船满湖歌吹，花外有高楼。
晴日暖，淡烟浮，恣嬉游，

三千粉黛，十二阑干，一片云头。

106 浣溪沙

作者：周邦彦

争挽桐花两鬓垂，小妆弄影照清池。
出帘踏袜趁蜂儿。
跳脱添金双腕重，琵琶拨尽四弦悲。
夜寒谁肯剪春衣？

107 浣溪沙

作者：周邦彦

楼上晴天碧四垂，楼前芳草接天涯。
劝君莫上最高梯。
新笋已成堂下竹，落花都上燕巢泥，
忍听林表杜鹃啼。

108 点绛唇

作者：周邦彦

台上披襟，快风一瞬收残雨。
柳丝轻举，蛛网黏飞絮。
极目平芜，应是春归处。
愁凝伫，楚歌声苦，村落黄昏鼓。

109 浣溪沙

作者：周邦彦

翠葆参差竹径成，新荷跳雨泪珠倾。
曲阑斜转小池亭。
风约帘衣归燕急，水摇扇影戏鱼惊。
柳梢残日弄微晴。

110 少年游

作者：周邦彦

并刀如水，吴盐胜雪，纤手破新橙。
锦幄初温，兽烟不断，相对坐调笙。低声问
：向谁行宿？
城上已三更。
马滑霜浓，不如休去，
直是少人行。

111 点绛唇

作者：周邦彦

孤馆迢迢，暮天草露沾衣润。
夜来秋近，月晕通风信。
今日原头，黄叶飞成阵，
知人闷，故来相趁，
共结临岐恨。

112 浣溪沙

作者：周邦彦

日薄尘飞官路平，眼前喜见汴河倾，
地遥人倦莫兼程。
下马先寻题壁字，出门闲记榜村名，
早收灯火梦倾城。

113 玉楼春

作者：周邦彦

桃溪不作从容住，秋藕绝来无续处。
当时相候赤栏桥，今日独寻黄叶路。
烟中列岫青无数，雁背夕阳红欲暮。
人如风后入江云，情似雨馀黏地絮。

114 长相思·舟中作

作者：周邦彦

好风浮，晚雨收，
林叶阴阴映艤舟，
斜阳明倚楼。
黯凝眸，忆旧游，
艇子扁舟来莫愁，
石城风浪秋。

115 鹤冲天·溧水长寿乡作

作者：周邦彦

梅雨霁，暑风和，高柳乱蝉多。
小园台榭远池波，鱼戏动新荷。
薄纱厨，轻羽扇，枕冷簟凉深院。
此时情绪此时天，无事小神仙。

116 关河令

作者：周邦彦

秋阴时晴渐向暝，变一庭凄冷。
伫听寒声，云深无雁影。
更深人去寂静，但照壁、孤灯相映。
酒已都醒，如何消夜永。

117 浣溪沙

作者：周邦彦

雨过残红湿未飞，珠帘一行透斜晖。
游蜂酿蜜窃香归。
金屋无人风竹乱，衣篝尽日水沉微。
一春须有忆人时。

118 卜算子

作者：陈瓘

身如一叶舟，万事潮头起。
水长船高一任伊，来往洪涛里。
潮落又潮生，今古长如此。
后夜开尊独酌时，月满人千里。

119 如梦令·雪中作

作者：苏庠

叠嶂晓理烟雨，忽作飞花无数。
整整复斜斜，来伴南枝清苦。
日暮，何许云林烟树。

120 谒金门·怀故居作

作者：苏庠

何处所？门外冷云堆浦。
竹里江梅寒未吐，茅屋疏疏雨。
谁遣愁来如许？小立野塘官渡，
手种凌霄今在否？柳浪迷烟渚。

121 谒金门·大叶庄怀张元孺作

作者：苏庠

杨柳渡，醉著青鞋归去。
点点沙鸥何处所？十里菰蒲雨。
抖擞向来尘土，卧看碧山云度。
寄语故进猿鹤侣，未见心先许。

122 诉衷情·渔父家风，醉中赠韦道士

作者：苏庠

杖头挑得布囊行，活计有谁争？
不肯侯家五鼎，碧涧一杯羹。
谿上月，岭头云，不劳耕。
瓮中春色，枕上华胥，便是长生。

123 诉衷情

作者：苏庠

倦投林樾当诛茅，鸿雁响寒郊。
溪上晚来杨柳，月露洗烟梢。
霜后渚，水分槽，尚平桥。
客床归梦，何必江南，门接云涛。

124 菩萨蛮·宜兴作

作者：苏庠

北风振野云平屋，寒溪淅淅流冰谷。
落日送归鸿，夕岚千万重。
荒坡垂斗柄，直北乡山近。
何必苦言归，石亭春满枝。

125 菩萨蛮·周彦达舟中作

作者：苏庠

眼中叠叠烟中树，晚云点点翻荷雨。
鸥泛渚边烟，绿蒲秋满川。
未成江海去，聊作林塘主。
客恨阔无津，风斜白叠巾。

126 菩萨蛮

作者：苏庠

年时忆著花月醉，而今花落人憔悴。
麦浪卷晴川，杜鹃声可怜。
有书无雁寄，初夏槐风细。
家在落霞边，愁逢江月圆。

127 浣溪沙·初春泛舟，时北山积雪盈尺，而水南梅林盛开

作者：毛滂

水北烟寒雪似梅，水南梅闹雪千堆。
月明南北两瑶台。
云近恰如天上坐，魂清疑向斗边来。
梅花多处载春回。

128 浣溪沙·泛舟还馀英馆

作者：毛滂

烟柳风蒲，冉冉斜曛，
小窗不用著帘遮，
载将山影转湾沙。
略约断时分岸色，
蜻蜓立处过汀花，
此情此水共天涯。

129 浣溪沙·送因觉先

作者：惠洪

南涧茶香笑语新，西州春涨小舟横，
困顿人归烂熳晴。
天迥游丝长百尺，日高飞絮满重城。
一番花信近清明。

130 浣溪沙·妙高墨梅

作者：惠洪

日暮江空船自流，谁家院落近沧洲，
一枝闲暇出墙头。
数朵幽香和月暗，十分归意为春留，
风撩片片是闲愁。

131 忆君王

作者:谢克家

依依宫柳拂宫墙,楼殿无人春昼长。
燕子归来依旧忙。
忆君王,
月破黄昏人断肠。

132 卜算子·往道山道中作

作者:王安中

客舍两三花,并脸开清晓。
一朵涓涓韵已高,一朵纤纤袅。
谁与插斜红?拥髻争春好。
此意遥知梦已传,月落前村悄。

133 浣溪沙·重阳后一日极目亭

作者:叶梦得

小雨初回昨夜凉,绕篱新菊已催黄。
碧空无际卷苍茫。
千里断鸿供远目,十年芳草挂愁肠。
缓歌聊与送瑶觞。

134 浣溪沙·送卢

作者:叶梦得

荷叶荷花水底天,玉壶冰酒酿新泉。
一欢聊复记他年。
我亦故山归去客,与君分手暂流连,
佳人休唱好因缘。

135 点绛唇·绍兴乙卯登绝顶小亭

作者:叶梦得

缥缈危亭,笑谈独在千峰上。
与谁同赏,万里横烟浪。

老去情怀,犹作天涯想。
空惆怅。

少年豪放,
莫学衰翁样。

136 点绛唇·丙辰八月二十七日雨中与何彦亭小饮

作者:叶梦得

山上飞泉,漫流山下知何处?
乱云无数,留得幽人住。
深闭柴门,听尽空檐雨。
秋还暮,
小窗低户,
惟有寒蛩语。

137 卜算子·五月八日夜,凤凰亭纳凉

作者:叶梦得

新月挂林梢,暗水鸣枯沼。
时见疏星落画檐,几点流萤小。
归意已无多,故作连环绕,
欲寄新声问采菱,水阔烟波渺。

138 点绛唇

作者:汪藻

新月娟娟,夜寒江静山衔斗。
起来搔首,梅影横窗瘦。
好个霜天,闲却传杯手。
君知否?乱鸦啼后,归兴浓于酒。

139 点绛唇

作者:曹组

云透斜阳,半楼红影明窗户。

暮山无灵敏，归雁愁还去。
十里平芜，花远重重树。
空凝伫。故人何处？
可惜春将暮。

140 点绛唇·水饭

作者：曹组

霜落吴江，万畦香稻来场圃。
夜村春黍，草屋寒灯雨。
玉粒长腰，沉水温温注。
相留住，共抄云子，
更听歌声度。

141 诉衷情·送春

作者：万俟咏

一鞭清晓喜还家，宿醉困流霞。
夜来小雨新霁，双燕舞风斜。
山不尽，水无涯，望中赊。
送春滋味，念远情怀，
分付杨花。

142 长相思·雨

作者：万俟咏

一声声，一更更。
窗外芭蕉窗里灯，
此时无限情。
梦难成，恨难平，
不道愁人不喜听，
空阶滴到明。

143 长相思·山驿

作者：万俟咏

短长亭，古今情。
楼外凉蟾一晕生，雨馀秋更清。
暮云平，暮山横。
几叶秋声和雁声，行人不要听。

144 豆叶黄

作者：陈克

树头初日鹁鸠鸣，
野店山桥新雨晴。
短褐无泥竹杖轻。
水泠泠，
梅片飞时春草青。

145 豆叶黄

作者：陈克

秋千人散小庭空，
麝冷灯昏愁杀侬。
独有闲阶两袖风。
月胧胧，一树梨花细雨中。

146 鹧鸪天·西都作

作者：朱敦儒

我是清都山水郎，天教分付与疏狂。
曾批给雨支风券，累上留云借月章。
诗万首，酒千觞，
几曾著眼看侯王。
玉楼金阙慵归去，且插梅花醉洛阳。

147 鹧鸪天

作者：朱敦儒

画舫东时洛水清，别离心绪若为情。
西风挹泪分携后，十夜长亭九梦君。

云背水，雁回汀，只应芳草见离魂。
前回共采芙蓉处，风自凄凄月自明。

148 朝中措

作者：朱敦儒

先生筇杖是生涯，挑月更担花。
把住都无憎爱，放行总是烟霞。
飘然携去，旗亭问酒，
萧寺寻茶。
恰似黄鹂无定，不知飞到谁家。

149 一落索

作者：朱敦儒

一夜雨声连晓，青灯相照。
旧时情绪此时心，
花不见，人空老。
可惜春光闲了，阴多晴少。
江南江北水连云，
问何处，寻芳草？

150 一落索

作者：朱敦儒

惯被好花留住，蝶飞莺语。
少年场上醉乡中，
容易放、春归去。
今日江南春暮，朱颜何处？
莫将愁绪比飞花，
花有数，愁无数。

151 十二时

作者：朱敦儒

连云衰草，连天晚照，连山红叶。

西风正摇落，更前溪呜咽。
燕去鸿归音信绝。
问黄花、又共谁折？
征人最愁处，送寒衣时节。

151 好事·渔父词

作者：朱敦儒

摇首红尘，醒醉更无时节。
活计绿蓑青笠，惯披霜冲雪。
晚来风定钓丝闲，上下是新月。
千里水天一色，看孤鸿明灭。

153 卜算子

作者：朱敦儒

古涧一枝梅，免被园林锁。
路远山泞不怕寒，似共春相躲。
幽思有谁知？托契都难可。
独自风流独自香，明月来寻我。

154 卜算子

作者：朱敦儒

旅雁向南飞，风雨群初失。
饥渴辛勤两翅垂，独下寒汀立。
鸥鹭苦难亲，矰缴忧相逼。
云海茫茫无处归，谁听哀鸣急？

155 诉衷情

作者：朱敦儒

老人无复少年欢，嫌酒倦吹弹。
黄昏又是风雨，楼外角声残。
悲故国，念尘寰，事难言。
下了纸帐，曳上青毡，一任霜寒。

156 相见欢

作者：朱敦儒

东风吹尽江梅，橘花开。
旧日吴王宫殿、长青苔。
今古事，英雄泪，老相催。
长恨夕阳西去、晚潮回。

157 相见欢

作者：朱敦儒

金陵城上西楼，倚清秋。
万里夕阳垂地，大江流。
中原乱，簪缨散，几时收？
试倩悲风吹泪，过扬州。

158 浣溪沙

作者：慕容岩卿妻

满目江山忆旧游，汀洲花草弄春柔，
长亭舣住木尘舟。
好梦易随流水去，芳心空逐晓云愁。
行人莫上望京楼。

159 浣溪沙·和陈相之题烟波图

作者：周紫芝

水上鸣榔不系船，醉来深闭短篷眠。
潮生潮落自年年。
一尺鲈鱼新活计，半蓑烟雨旧衣冠。
庙堂空有画图看。

160 卜算子·席上送王彦猷

作者：周紫芝

江北上归舟，再见江南岸。
江北江南几度秋，梦里朱颜换。
人是岭头云，聚散天谁管。
君似孤云何处归，我似离群雁。

161 菩萨蛮

作者：周紫芝

风头不定云来去，天教月到湖心住。
遥夜一襟愁，水风浑似秋。
藕花迎露笑，暗水飞萤照。
渔笛莫频吹，客愁人不知。

162 朝中措·登西湖北高峰作

作者：周紫芝

西湖烟尽水溶溶，一笑与谁同？
多谢湖边霜菊，伴人三见秋风。
两高南北，天教看尽，吴越西东。
趁取老来犹健，登临莫放杯空。

163 清平乐

作者：周紫芝

芦洲晚净，雨罢江如镜。
属玉双飞栖不定，数点晚来烟艇。
梦回满眼凄凉，一成无奈思量。
舟在绿杨堤下，蝉嘶欲尽斜阳。

164 如梦令

作者：李祁

春水湖塘深处，
竹暗沙洲无路。

闲伴落花来，
却信东风归去。
且住，且住，
细看两山烟雨。

165 如梦令

作者：李祁

不见玉人清晓，
长啸一声云杪。
碧水满阑塘，
竹外一枝风袅。
奇妙，奇妙，
半夜山空月皎。

166 九张机

作者：无名氏

一张机，采桑陌上试春衣。
风晴日暖慵无力，
桃花枝上，
啼莺言语，
不肯放人归。

167 九张机

作者：无名氏

两张机，行人立马意迟迟。
深心未忍轻分付，
回头一笑，
花间归去，
只恐被花知。

168 九张机

作者：无名氏

三张机，吴蚕已老燕雏飞。
东风宴罢长洲苑，
轻绡催趁，
馆娃宫女，
要换舞时衣。

169 九张机

作者：无名氏

四张机，咿哑声里暗颦眉。
回梭织朵垂莲子，
盘花易绾，
愁心难整，
脉脉乱如丝。

170 九张机

作者：无名氏

五张机，横纹织就沈郎诗。
中心一句无人会，
不言愁恨，
不言憔悴，
只恁寄相思。

171 九张机

作者：无名氏

六张机，行行都是耍花儿，
花间更有双蝴蝶。
停梭一晌，
闲窗影里，
独自看多时。

172 九张机

作者：无名氏

七张机，鸳鸯织就又迟疑。
只恐被人轻裁剪，
分飞两处，
一场离恨，
何计再相随。

173 九张机

作者：无名氏

八张机，回纹知是阿谁诗？
织成一片凄凉意。
行行读遍，
厌厌无语，
不忍更寻思。

174 九张机

作者：无名氏

九张机，双花双叶又双枝。
薄情自古多离别。
从头到底，
将心萦系，
穿过一条丝。

175 清平乐

作者：李清照

年年雪里，常插梅花醉。搓尽梅花无好意，
赢得满衣清泪。
今年海角天涯，萧萧两鬓生华。
看取晚年风势，故应难看梅花。

176 如梦令

作者：李清照

常记溪亭日暮，
沉醉不知归路。
兴尽晚回舟，
误入藕花深处。
争渡，争渡，
惊起一滩鸥鹭。

177 如梦令

作者：李清照

昨夜雨疏风骤，
浓睡不消残酒。
试问卷帘人，
却道海棠依旧。
知否，知否？
应是绿肥红瘦。

178 浣溪沙

作者：李清照

淡荡春光寒食天，玉炉沉水袅残烟，
梦回山枕隐花钿。
海燕未来人斗草，江梅已过柳生绵，
黄昏疏雨温秋千。

179 醉花阴

作者：李清照

薄雾浓云愁永昼，瑞脑消金兽。
佳节又重阳，玉枕纱厨，
半夜凉初透。
东篱把酒黄昏后，有暗香盈袖。
莫道不消魂，
帘卷西风，人比黄花瘦。

180 武陵春·晚春

作者：李清照

风住尘香花已尽，日晚倦梳头。
物是人非事事休，欲语泪先流。
闻说双溪春尚好，也拟泛轻舟。
只恐双溪舴艋舟，
载不动、许多愁。

181 点绛唇·闺思

作者：李清照

寂寞深闺，柔肠一寸愁千缕。
惜春春去，几点催花雨。
倚遍阑干，只是无情绪。
人何处？
连天衰草，望断归来路。

182 采桑子

作者：吕本中

恨君不似江楼月，南北东西。
南北东西，只有相随无别离。
恨君却似江楼月，暂满还亏。
暂满还亏，待得团圆是几时？

183 南歌子

作者：吕本中

驿路侵斜月，溪桥度晓霜。
短篱残菊一枝黄，
正是乱山深处，过重阳。
旅枕元无梦，寒更每自长。
只言江左好风光，
不道中原归思，转凄凉。

184 秦楼月

作者：向子煙

芳菲歇，故园目断伤心切。
伤心切，无边烟水，无穷山色。
可堪更近乾龙节，眼中泪尽空啼血。
空啼血，子规声外，晓风残月。

185 阮郎归·绍兴乙卯大雪行鄞阳道中

作者：向子煙

江南江北雪漫漫，遥知易水寒。
彤云深处望三关，断肠山又山。
天可老，海能翻，消除此恨难。
频闻遣使问平安，几时鸾辂还？

168 卜算子·中秋欲雨还晴

作者：向子煙

雨意挟风回，月色兼天静。
心与秋空一样清，万象森如影。
何处一声钟？令我发深省。
独立沧浪忘却归，不觉霜华冷。

187 长相思·绍兴戊辰闰中秋

作者：向子煙

年重月，月重光，
万瓦千林白似霜，
扁舟入醉乡。
山苍苍，水茫茫，
严濑当时不是狂，
高风引兴长。

188 生查子

作者：向子煙

春心如杜鹃，日夜思归切。
啼尽一川花，愁落千山月。
遥怜白玉人，翠被馀香歇。
可惯独眠寒？减动丰肌雪。

189 生查子

作者：向子煙

近似月当怀，远似花藏雾。
好是月明时，同醉花深处。
看花不自持，对月空相顾。
愿学月频圆，莫作花飞去。

190 减字木兰花·题雄州驿

作者：蒋兴祖女

朝云横度，辘轳车声如水去。
白草黄沙，月照孤村三两家。
飞鸿过也，万结愁肠无昼夜。
渐近燕山，回首乡关归路难。

191 生查子

作者：蔡伸

画堂初见伊，明月当窗满。
今夜月如眉，话别河桥畔。
重见约中秋，莫负于飞愿。
免使月圆时，两处空肠断。

192 南乡子

作者：蔡伸

天外雨初收，
风紧云轻已变秋，
邂逅故人同一笑，迟留。
聚散人生宜自谋。

去路指南州，
万顷云涛一叶舟。
莫话太湖波浪险，归休。
人在溪边正倚楼。

193 谒金门

作者：蔡伸

溪声咽，溪上有人离别。
别语叮咛和泪说，罗巾沾泪血。
尽做到刚肠如铁，到此也应愁绝。
回首断山帆影灭，画船空载月。

194 卜算子

作者：蔡伸

风雨送春归，寂寞花空委。
枝上红稀地上多，万点随流水。
翠黛敛春愁，照影临清泚。
应念韶华惜舜颜，洒遍胭脂泪。

195 卜算子

作者：蔡伸

前度月圆时，月下相携手。
今夜天边月又圆，
夜色如清昼。
风月浑依旧，水馆空回首。
明夜归来试问伊，
曾解思量否？

196 长相思

作者：蔡伸

村姑儿，红袖衣，
初发黄梅插稻时，双双女伴随。

长歌诗,短歌诗,
歌里真情恨别离.休言伊不知.

197 西楼子

作者:蔡伸

楼前流水悠悠,驻行舟.
满目寒云衰草,使人愁.
多少恨,多少泪,谩迟留.
何似蓦然拚舍,去来休.

198 点绛唇·赋登楼

作者:王灼

休惜馀春,试来把酒留春住.
问春无语,帘卷西山雨.
一掬愁心,强欲登高赋.
山无数,烟波无数,不放春归去.

199 长相思

作者:王灼

来匆匆,去匆匆,
短梦无凭春又空,难随郎马踪.
山重重,水重重,
飞絮流云西复东,音书何处通?

200 卜算子·送春

作者:如晦

有意送春归,无计留春住.
毕竟年年用著来,何似休归去.
目断楚天遥,不见春归路.
风急桃花也似愁,点点飞红雨.

201 忆王孙·春词

作者:李重元

萋萋芳草忆王孙,
柳外楼高空断魂.
杜宇声声不忍闻.
欲黄昏,
雨打梨花深闭门.

202 忆王孙·夏词

作者:李重元

风蒲猎猎小池塘,
过雨荷花满院香.
沉李浮瓜冰雪凉.
竹方床,
针线慵拈午梦长.

203 忆王孙·秋词

作者:李重元

飏飏风冷荻花秋,
明月斜侵独倚楼.
十二珠帘不上钩.
黯凝眸,
一点渔灯古渡头.

204 忆王孙·冬词

作者:李重元

彤云风扫雪初晴,
天外孤鸿三两声.
独拥寒衾不忍听.
月笼明,
窗外梅花瘦影横.

205 鹧鸪天·寄李之问

作者:聂胜琼

玉惨花愁出凤城，莲花楼下柳青青。
尊前一唱《阳关》后，别个人人第五程。
寻好梦，
，梦难成，
况谁知我此时情。
枕前泪共帘前雨，隔个窗儿滴到明。

206 菩萨蛮

作者:李弥逊

江城烽火连三月，不堪对酒长亭别。
休作断肠声，老来无泪倾。
风高帆影疾，目送舟痕碧。
锦字几时来？薰风无雁回。

207 忆秦娥·五日移舟明山下作

作者:陈与义

鱼龙舞，湘君欲下潇湘浦。
潇湘浦，兴亡离合，乱波平楚。
独无尊酒酬端午，移舟来听明山雨。
明山雨，白头孤客，洞庭怀古。

208 浣溪沙·离杭日，梁仲谋惠酒，独酌数杯

作者:陈与义

送了栖鸦复暮钟，栏干生影曲屏东。
卧看孤鹤驾天风。
起舞一尊明月下，秋空如水酒如空。
谪仙已去与谁同？

209 浣溪沙

作者:张元幹

山绕平湖波撼城，湖光倒影浸山青。
水晶楼下欲三更。
雾柳暗时云度月，露荷翻处水流萤。
萧萧散发到天明。

210 长相思令

作者:邓肃

一重山，两重山，
山远天高烟水寒，相思枫叶舟。
菊花开，菊花残，
雁已西飞人未还，一帘风月闲。

211 长相思令

作者:邓肃

红花飞，白花飞，
郎与春风同别离，春归郎不归。
雨霏霏，雪霏霏，
又是黄昏独掩扉，孤灯隔翠帷。

212 诉衷情令·长安怀古

作者:康与之

阿房废址汉荒丘，狐兔又群游。
豪华尽成春梦，留下古今愁。
君莫上，古原头，泪难收。
夕阳西下，塞雁南飞，渭水东流。

213 长相思·游西湖

作者:康与之

南高峰，北高峰，

一片湖光烟霭中，春来愁杀侬。
郎意浓，妾意浓，
油壁车轻郎马骢，相逢九里松。

214 卜算子

作者：康与之

潮生浦口云，潮落津头树。
潮本无心落又生，人自来还去。
今古短长亭，送往迎来处，
老尽东西南北人，亭下潮如故。

215 霜天晓角·题采石蛾眉亭

作者：韩元吉

倚天绝壁，直下江千尺。
天际两蛾凝黛，
愁与恨，几时极？
怒潮风正急，酒醒闻塞笛。
试问谪仙何处？
青山外，远烟碧。

216 点绛唇·途中逢管倅

作者：赵彦端

憔悴天涯，故人相遇情如故。
别离何遽，忍唱《阳关》句？
我是行人，更送行人去。
愁无据。
寒蝉鸣处，回首斜阳暮。

217 朝中措·乘风亭初成

作者：赵彦端

长松擎月与天通，霜叶乱惊鸿。
露炯乍疑杯滟，云生似觉衣重。

江南胜处，青环楚嶂，红半溪枫。
倦客会应归去，一亭长枕寒空。

218 生查子

作者：赵彦端

新月曲如眉，未有团圆意。
红豆不堪看，满眼相思泪。
终日掰桃穰，人在心儿里。
两杂隔墙花，早晚成连理。

219 生查子·情景

作者：姚宽

郎如陌上尘，妾似堤边絮。
相见两悠扬，踪迹无寻处。
酒面扑春风，泪眼零秋雨。
过了别离时，还解相思否？

220 浣溪沙·和无咎韵

作者：陆游

懒向沙头醉玉瓶，唤君同赏小窗明。
夕阳吹角最关情。
忙日苦多闲日少，新愁常续旧愁生。
客中无伴怕君行。

221 浪淘沙·丹阳浮玉亭席上作

作者：陆游

绿树暗长亭，几把离尊。
《阳关》常恨不堪闻，
何况今朝秋色里，
身是行人。
清泪浥罗巾，各自消魂。
一江离恨恰平分。

安得千寻横铁锁，
截断烟津？

222 南乡子·赋归

作者：陆游

归梦寄吴檣，
水驿江程去路长。
想见芳洲初系缆，
斜阳，烟树参差认武昌。
愁鬓点新霜，
曾是朝衣染御香。
重到故乡交旧少，
凄凉，却恐他乡胜故乡。

223 好事近

作者：陆游

岁晚喜东归，扫尽市朝陈迹。
拣得乱山环处，钓一潭澄碧。
卖鱼沽酒醉还醒，心事付横笛。
家在万重云外，有沙鸥相识。

224 好事近·登梅仙山绝顶望海

作者：陆游

挥袖上西峰，孤绝去天无尺。
拄杖下临鲸海，数烟帆历历。
贪看天气舞青鸾，归路已将夕。
多谢半山松吹，解殷勤留客。

225 鹧鸪天·送叶梦锡

作者：陆游

家住东吴近帝乡，平生豪举少年场。
十千沽酒青楼上，百万呼卢锦瑟傍。

身易老，恨难忘，尊前赢得是凄凉。
君归为报京华旧，一事无成两鬓霜。

226 鹧鸪天

作者：陆游

家住苍烟落照间，丝毫尘事不相关。
斟残玉瀣行穿竹，卷罢《黄庭》卧看山。
贪啸傲，
任衰残，不妨随处一开颜。
元知造物心肠别，老却英雄似等闲。

227 朝中措·梅

作者：陆游

幽姿不入少年场，无语只凄凉。
一个飘零身世，十分冷淡心肠。
江头月底，新诗旧梦，孤恨清香。
任是春风不管，也曾先识东皇。

228 卜算子·咏梅

作者：陆游

驿外断桥边，寂寞开无主。
已是黄昏独自愁，更著风和雨。
无意苦争春，一任群芳妒。
零落成泥碾作尘，只有香如故。

229 乌夜啼

作者：陆游

檐角楠阴转日，楼前荔子吹花。
鹧鸪声里霜天晚，叠鼓已催衙。
乡梦时来枕上，京书不到天涯。
邦人讼少文移省，闲院自煎茶。

230 柳梢青·乙巳二月西兴赠别

作者：陆游

十载江湖，行歌沽酒，不到京华。
底事翩然？长亭烟草，衰鬓风沙。
凭高目断天涯，细雨外，楼台万家。
只恐明朝，一时不见，人共梅花。

231 桃源忆故人(序略)

作者：陆游

斜阳寂历柴门闭，一点炊烟时起。
鸡犬往来林外，俱有萧然意。
衰翁老去疏荣利，绝爱山城无事。
临去画楼频倚，何日重来此。

232 豆叶黄

作者：陆游

一春常是雨和风，
风雨晴时春已空。
谁惜泥沙万点红。
恨难穷，
恰似衰翁一世中。

233 鹊桥仙·夜闻杜鹃

作者：陆游

茅檐人静，蓬窗灯暗，
春晚连江风雨。
林莺巢燕总无声，
但月夜、常啼杜宇。
催成清泪，惊残孤梦，
又拣深枝飞去。
故山犹自不堪听，
况半世、飘然羁旅。

234 长相思

作者：陆游

云千重，水千重，
身在千重云水中。
月明收钓筒。
头未童，耳未聋，
得酒犹能双脸红。
一尊谁与同？

235 长相思

作者：陆游

桥如虹，水如空，
一叶飘然烟雨中，
天教称放翁。
侧船篷，使江风，
蟹舍参差渔市东，
到时闻暮钟。

236 长相思

作者：陆游

面苍然，鬓皤然，
满腹诗书不直钱，
官闲常昼眠。
画凌烟，上甘泉，
自古功名属少年，
如心惟杜鹃。

237 长相思

作者：陆游

暮山青，暮霞明，
梦笔桥头艇子横，

蘋风吹酒醒。
看潮生，看潮平，
小住西陵莫较程，
蓴丝初可烹。

238 诉衷情

作者：陆游

当年万里觅封侯，匹马戍梁州。
关河梦断何处，尘暗旧貂裘。
胡未灭，鬓先秋，泪空流。
此生谁料，心在天山，身老沧洲。

239 生查子

作者：陆游

还山荷主恩，聊试扶犁手。
新结小茅茨，恰占青江口。
风尘不化衣，邻曲常持酒。
那似宦游时，折尽长亭柳。

240 点绛唇

作者：陆游

采药归来，独寻茅店沽新酿。
暮烟千嶂，处处闻渔唱。
醉弄扁舟，不怕黏天浪。
江湖上，遮回疏放，
作个闲人样。

241 渔父·灯下读玄真子渔歌，因怀山阴故隐，追拟

作者：陆游

石帆山下雨空濛，
三扇香新翠箬篷。

蘋叶绿，蓼叶红，
回首功名一梦中。

242 渔父

作者：陆游

湘湖烟雨长蓴丝，
菰米新炊滑上匙。
云散后，月斜时，
潮落舟横醉不知。

243 秋波媚·七月十六日晚登高兴亭望长安南山

作者：陆游

秋到边城角声哀，烽火照高台。
悲歌击筑，凭高酹酒，
此兴悠哉。
多情谁似南山月，特地暮云开。
灞桥烟柳，曲江池馆，
应待人来。

244 夜游宫·记梦寄师伯浑

作者：陆游

雪晓清笳乱起，
梦游处，不知何地。
铁骑无声望似水，
想关河，雁门西，青海际。
睡觉寒灯里，
漏声断，月斜窗纸。
自许封侯在万里，
有谁知？鬓虽残，心未死。

245 鹊桥仙

作者：陆游

一竿风月，一蓑烟雨，家在钓台西住。
卖鱼生怕近城门，况肯到、红尘深处？
潮生理
棹，潮平系缆，潮落浩歌归去。
时人错把比严光，我自是、无名渔父。

246 霜天晓角

作者：范成大

少年豪纵，袍锦团花凤。
曾是京城游子，
驰宝马，飞金鞚。
旧游浑似梦，鬓点吴霜重。
多少燕情莺意，
都泻入，玻璃瓮。

247 霜天晓角·梅

作者：范成大

晚晴风歇，一夜春威折。
脉脉花疏天淡，
云来去，数枝雪。
胜绝，愁亦绝，此情谁共说？
惟有两行低雁，
知人倚、画楼月。

248 卜算子

作者：游次公

风雨送人来，风雨留人住。
草草杯盘话别离，风雨催人去。
泪眼不曾晴，眉黛愁还聚。
明日相思莫上楼，楼上多风雨。

249 好事近·七月十三日夜登万花川谷望月作

作者：杨万里

月未到诚斋，先到万花川谷。
不是诚斋无月，隔一林修竹。
如今才是十三夜，月色已如玉。
未是秋光奇绝，看十五十六。

250 昭君怨·咏荷上雨

作者：杨万里

午梦扁舟花底，香满西湖烟水，
急雨打篷声，梦初惊。
却是池荷跳雨，散了真珠还聚。
聚作水银窝，泻清波。

251 浣溪沙·梅菁山遇雪

作者：李洪

天矫翔鸾谿上峰，飘萧雪霰打船篷。
天花凌乱水晶宫。
飞透纸窗斜取势，吹谿回面舞因风。
身游水墨画图中。

252 浣溪沙

作者：张孝祥

霜日明霄水蘸空，鸣鞘声里绣旗红。
澹烟衰草有无中。
万里中原烽火北，一尊浊酒戍楼东。
酒阑挥泪向悲风。

253 浣溪沙·洞庭

作者：张孝祥

行尽潇湘到洞庭，楚天阔处数峰青。
旗梢不动晚波平。
红蓼一湾纹缬乱，白鱼双尾玉刀明。
夜凉船影浸疏星。

254 西江月·丹阳湖

作者：张孝祥

问讯湖边春色，重来又是三年。
东风吹我过湖船，杨柳丝丝拂面。
世路如今已惯，此心到处悠然。
寒光亭下水如天，飞起沙鸥一片。

255 西江月·阻风三峰下

作者：张孝祥

满载一船秋色，平铺十里湖光。
波神留我看斜阳，放起鳞鳞细浪。
明日风回更好，今宵露宿何妨？
水晶宫里奏《霓裳》，准拟岳阳楼上。

256 卜算子

作者：张孝祥

风生杜若洲，日暮垂杨浦。
行到田田乱叶边，不见凌波女。
独自倚危栏，欲向荷花语。
无奈荷花不应人，背立啼红雨。

257 南柯子

作者：王炎

山冥云阴重，天寒雨意浓。
数枝幽艳湿啼红。
莫为惜花惆怅，对东风。
蓑笠朝朝出，沟塍处处通。

人间辛苦是三农。
要得一犁水足，望年丰。

258 鹧鸪天·代人赋

作者：辛弃疾

晚日寒鸦一片愁，柳塘新绿却温柔。
若教眼底无离恨，不信人间有白头。
肠已断，泪难收，相思重上小红楼。
情知已被山遮断，频倚阑干不自由。

259 鹧鸪天·送人

作者：辛弃疾

唱彻《阳关》泪未干，功名馀事且加餐。
浮天水送无穷树，带雨云埋一半山。
今古恨，几千般，只应离合是悲欢？
江头未是风波恶，别有人间行路难。

260 鹧鸪天·鹅湖归，病起作

作者：辛弃疾

枕簟溪堂冷欲秋，断云依水晚来收。
红莲相倚浑如醉，白鸟无言定自愁。
书咄咄，且休休。一丘一壑也风流。
不知筋力衰多少，但觉新来懒上楼。

261 菩萨蛮·书江西造口壁

作者：辛弃疾

郁孤台下清江水，中间多少行人泪！
西北望北安，可怜无数山。
青山遮不住，毕竟东流去。
江晚正愁予，山深闻鹧鸪。

262 菩萨蛮·送祐之弟归浮梁

作者:辛弃疾

无情最是江头柳,长条折尽还依旧。
木叶下平湖,雁来书有无?
雁无书尚可,妙语凭谁和?
风雨断肠时,小山生桂枝。

263 菩萨蛮·赏心亭为叶丞相赋

作者:辛弃疾

青山欲共高人语,联翩万马来无数。
烟雨却低回,望来终不来。
人言头上发,总向愁中白。
拍手笑沙鸥,一身都是愁。

264 乌夜啼·山行约范廓之不至

作者:辛弃疾

江头醉倒山公,月明中,
记得昨宵归路,笑儿童。
溪欲转,山已断,两三松。
一段可怜风月,欠诗翁。

265 清平乐·博山道中即事

作者:辛弃疾

柳边飞鞚,露湿征衣重。
宿鹭惊窥沙影动,应有鱼虾入梦。
一川淡月疏星,浣沙人影娉婷。
笑背行人归去,门前稚子啼声。

266 清平乐

作者:辛弃疾

茅檐低小,溪上青青草。
醉里蛮音相媚好,白发谁家翁媪。
大儿锄豆溪东,中儿正织鸡笼,
最喜小儿亡赖,溪头卧剥莲篷。

267 清平乐·独宿博山王氏庵

作者:辛弃疾

绕床饥鼠,蝙蝠翻灯舞。
屋上松风吹急雨,破纸窗间自语。
平生塞北江南,归来华发苍颜。
布被秋宵梦觉,眼前万里江山。

268 鹧鸪天·鹅湖归,病起作

作者:辛弃疾

著意寻春懒便回,何如信步两三杯。
山才好处行还倦,诗未成时雨早催。
携竹杖,更芒鞋,朱朱粉粉野蒿开。
谁家寒食归宁女,笑语柔桑陌上来。

269 鹧鸪天·代人赋

作者:辛弃疾

陌上柔条初破芽,东邻蚕种已生些。
平冈细草鸣黄犊,斜日寒林点暮鸦。山
远近,
,路横斜,青旗沽酒有人家。
城中桃李愁风雨,春在溪头野荠花。

270 西江月·夜行黄沙道中

作者:辛弃疾

明月别枝惊鹊,清风半夜鸣蝉。
稻花香里说丰年,听取蛙声一片。
七八年星天外,两三点雨山前。

旧时茅店社林边，路转溪桥忽见。

271 生查子·独游雨岩

作者：辛弃疾

溪边照影行，天在清溪底。
天上有行云，人在行云里。
高歌谁和余？空谷清音起。
非鬼亦非仙，一曲桃花水。

272 丑奴儿·书博山道中壁

作者：辛弃疾

少年不识愁滋味，爱上层楼。
爱上层楼，为赋新词强说愁。
而今识尽愁滋味，欲说还休。
欲说还休，却道天凉好个秋！

273 浣溪沙·常山道中

作者：辛弃疾

北陇田高踏水频，西溪禾早已尝新，
隔墙沽酒醉纤鳞。
忽有微凉何处雨？更无留影霎时云。
卖瓜声过竹边村。

274 太常引·建康中秋为吕叔潜赋

作者：辛弃疾

一轮秋影转金波，飞镜又重磨。
把酒问姮娥，被白发、欺人奈何？
乘风好去，长空万里，直下看山河。
斫去桂婆娑，人道是、清光更多。

275 鹧鸪天

作者：辛弃疾

欲上高楼去避愁，愁还随我上高楼。
经行几处江山改，多少亲朋尽白头。
归休去，去归休，不成人总要封侯。
浮云出处元无定，得似浮云也自由。

276 西江月·遣兴

作者：辛弃疾

醉里且贪欢笑，要愁那得功夫。
近来始觉古人书，信着全无是处。
昨夜松边醉倒，问松我醉何如？
只疑松动要来扶，以手推松曰：去！

277 鹧鸪天·有客慨然谈功名，因追念少年时事戏作

作者：辛弃疾

壮岁旌旗拥万夫，锦襜突骑渡江初。
燕兵夜娖银胡觥，汉箭朝飞金仆姑。
追往事，叹今吾，春风不染白髭须。
都将万字平戎策，换得东家种树书。

278 南乡子·登京口北固亭有怀

作者：辛弃疾

何处望神州，满眼风光北固楼。
千古兴亡多少事，悠悠。
年少万兜鍪，坐断东南战未休。
天下英雄谁敌手？曹刘。
生子当如孙仲谋。

279 减字木兰花

作者：卢炳

莎衫筠笠，正是村村农务急。
绿水千畦，惭愧秧针出得齐。
风斜雨细，麦欲黄时寒又至。
饷妇耕夫，画作今年稔岁图。

280 点绛唇·丁未冬过吴松作

作者：姜夔

燕雁无心，太湖西畔随云去。
数峰清苦，商略黄昏雨。
第四桥边，拟共天随住。
今何许？
凭阑怀古，残柳参差舞。

281 忆王孙·鄱阳彭氏小楼作

作者：姜夔

冷红叶叶下塘秋，
长与行云共一舟。
零落江南不自由。
两绸缪，
料得吟鸾夜夜愁。

282 鹧鸪天·元夕有所梦

作者：姜夔

肥水东流无尽期，当初不合种相思。梦中未
比丹青见，暗里忽惊山鸟啼。
春未绿，鬓先丝。
人间别久不成悲。
谁教岁岁红篷夜，两处沉吟各自知。

283 踏莎行·自沔东来，丁未元日至金陵，江上感梦而作

作者：姜夔

燕燕轻盈，莺莺娇软，
分明又向华胥见。
夜长争得薄情知？
春初早被相思染。
别后书辞，别时针线，
离魂暗逐郎行远。
淮南皓月冷千山，
冥冥归去无人管。

284 浣溪沙(序略)

作者：姜夔

著酒行行满袂风，草枯霜鹞落晴空，
销魂都在夕阳中。
恨入四弦人欲老，梦寻千驿意难通，
当时何以莫匆匆。

285 鹧鸪天·正月十一日观灯

作者：姜夔

巷陌风光纵赏时，笼纱未出马先嘶。
白头居士无呵殿，只有乘肩小女随。
花满市，月侵衣，少年情事老来悲。
沙河塘上春寒浅，看了游人缓缓归。

286 昭君怨·园池夜泛

作者：张鎡

月在碧虚中住，人向乱荷中去。
花气杂风凉，满船香。
云被歌声摇动，酒被诗情掇送。
醉里卧花心，拥红衾。

287 阮郎归·月下感事

作者:史达祖

旧时明月旧时身,旧时梅萼新.
旧时月底似梅人,梅春人不春.
香入梦,粉成尘,情多多断魂.
芙蓉孔雀夜温温,愁痕即泪痕.

288 霜天晓角·仪真江上夜泊

作者:黄机

寒江夜宿,长啸江之曲.
水底鱼龙惊动,
风卷地,浪翻屋.
诗情吟未足,酒兴断还续.
草草兴亡休问,
功名泪,欲盈掬.

289 忆秦娥

作者:黄机

秋萧索,梧桐落尽西风恶.
西风恶,数声新雁,数声残角.
离愁不管人飘泊,年年孤负黄花约.
黄花约,几重庭院,几重帘幕.

290 月上瓜洲·南徐多景楼作

作者:张辑

江头又见新秋,几多愁.
塞草连天何处、是神州?
英雄恨,古今泪,水东流.
惟有渔竿明月、上瓜洲.

291 诉衷情·章贡别怀

作者:严仁

一声水调解兰舟,人间无此愁.
无情江水东流去,与我泪争流.
人已远,更回头,苦凝眸.
断魂何处?
梅花岸曲,小小红楼.

292 清平乐·五月十五夜玩月

作者:刘克庄

纤云扫迹,万顷玻璃色.
醉跨玉龙游八极,历历天青海碧.
水晶宫殿飘香,群仙方按《霓裳》.
消得几多风露,变教人世清凉.

293 清平乐·五月十五夜玩月

作者:刘克庄

风高浪快,万里骑蟾背.
曾识姮娥真体态,素面元无粉黛.
身游银阙珠宫,俯看积气濛濛.
醉里偶摇桂树,人间唤作凉风.

294 忆秦娥

作者:刘克庄

梅谢了,塞垣冻解鸿归早.
鸿归早,凭伊问讯,
大梁遗老.
浙河西面边声悄,
淮河北去炊烟少.
炊烟少,宣和宫殿,
冷烟衰草.

295 点绛唇·访牟存叟南漪钓隐

作者:周晋

午梦初回，卷帘尽放春愁去。
昼长无侣，自对黄鹂语。
絮影蘋香，春在无人处。
移舟去，未成新句，
一砚梨花雨。

296 诉衷情

作者：吴文英

片云载雨过江鸥，水色澹汀洲。
小莲玉惨红怨，翠被又经秋。
凉意思，到南楼，小帘钩。
半窗灯晕，几叶芭蕉，客梦床头。

297 浣溪沙

作者：吴文英

门隔花深梦旧游，夕阳无语燕归愁。
玉纤香动小帘钩。
落絮无声春堕泪，行云有影月含羞。
东风临夜冷于秋。

298 闻鹊喜·吴山观涛

作者：周密

天水碧，染就一江秋色。
鳌戴雪山龙起蛰，快风吹海立。
数点烟鬟青滴，一杼霞绡红湿，
白鸟明边帆影直，隔江闻夜笛。

299 清平乐

作者：张炎

候蛩凄断，人语西风岸。
月落沙平江似练，望尽芦花无雁。
暗教愁损兰成，可怜夜夜关情。

只有一枝梧叶，不知多少秋声。

300 清平乐

作者：张炎

采芳人杳，顿觉游情少。
客里看春多草草，总被诗愁分了。
去年燕子天涯，今年燕子谁家？
三月休听夜雨，如今不是催花。